

Neum, 05.10.2011. godine  
Broj: 486/11

**ZAPISNIK I ZAKLJUČCI**  
**SA ŠESNAESTE SJEDNICE PREDSJEDNIŠTVA SKUPŠTINE**  
**SAVEZA OPĆINA I GRADOVA FEDERACIJE BiH**

U Neumu je dana 05.10.2011. godine održana Šesnaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Skupštine Saveza prisustvovali su:

1. **g-din Vlado Alilović**, načelnik Općine Vitez, predsjednik
2. **g-din Husejin Smajlović**, načelnik Općine Zenica, zamjenik predsjednika
3. **g-din Ermin Hajder**, načelnik Općine Bosanski Petrovac
4. **g-din Muhamed Ramović**, načelnik Općine Goražde
5. **g-din Salem Dedić**, načelnik Općine Jablanica
6. **g-din Hakija Osmić**, načelnik Općine Zavidovići
7. **g-din Hasan Ajkunić**, načelnik Općine Bugojno
8. **g-din Senaid Memić**, načelnik Općine Ilidža
9. **g-din Rasim Omerović**, načelnik Općine Kalesija
10. **g-din Igor Kamočaji**, zamjenik gradonačelnika, Grad Sarajevo

Pored gore navedenih, sjednici su prisustvovali i: **g-din Ivo Jerkić- Ino**, načelnik Općine Čitluk i predsjedavajući Skupštine Saveza, **g-đa Vesna Travljanin**, direktor Saveza, **g-din Predrag Šupljeglav**, načelnik odjela, Grad Mostar, **g-đa Dragana Solaković**, pomoćnik gradonačelnika Grada Sarajeva, **g-din Boris Maslo**, direktor GAP projekta, **g-din Slaviša Šućur**, savjetnik (GAP projekat), **g-đa Jasmina Đikić**, savjetnik (GAP projekat), **g-din Mersad Beglerbegović**, savjetnik (GAP projekat), **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Selma Fišek**, viši saradnik za pravna pitanja, **g-đa Elvira Imširović-Bolić**, viši saradnik za pravna pitanja, i **g-đica Šejla Hasić**, viši saradnik za projekte.

G-din Alilović pozdravlja prisutne, konstatuje da sjednici prisustvuje devet članova Predsjedništva, te da načelnik Bosansko Petrovca malo kasni. Također pozdravlja načelnika Ivu Jerkića, predsjedavajućeg Skupštine Saveza, predstavnike GAP-a, na čelu sa g-dinom Maslom. G-din Alilović pozdravlja i želi dobrodošlicu i novom članu Predsjedništva, novoizabranom načelniku Općine Ilidža, g-dinu Senaidu Memiću.

G-din Alilović konstatuje da su svi članovi dobili materijale, predlaže Dnevni red kako slijedi uz prijedlog za dopunu sa pet novih tačaka:

1. Usvajanje Zapisnika i Zaključaka sa Petnaeste sjednice Predsjedništva Skupštine Saveza općina i gradova Federacije Bosne i Hercegovine

2. Priprema materijala za sjednicu Skupštine Saveza:
  - a) Izvještaj o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine  
Izjesticilac: Vlado Alilović, predsjednik Predsjedništva Skupštine Saveza
  - b) Izvještaj o radu komisija Skupštine Saveza općina i gradova Federacije Bosne i Hercegovine za period april 2010. – septembar 2011. godine  
Izjesticilac: Vlado Alilović, predsjednik Predsjedništva Skupštine Saveza
  - c) Strategija razvoja Saveza općina i gradova Federacije Bosne i Hercegovine za period 2011. – 2015. godina  
Izjesticilac: Vlado Alilović, predsjednik Predsjedništva Skupštine Saveza
  - d) Strategija lobiranja Saveza općina i gradova Federacije Bosne i Hercegovine  
Izjesticilac: Vlado Alilović, predsjednik Predsjedništva Skupštine Saveza
  - e) Plan rada Saveza općina i gradova Federacije Bosne i Hercegovine za period 2011. – 2012. godina  
Izjesticilac: Vlado Alilović, predsjednik Predsjedništva Skupštine Saveza
  - f) Odluka o izmjeni Odluke o obrazovanju Komisije za razvoj i unapređenje lokalne samouprave  
Izjesticilac: Vlado Alilović, predsjednik Predsjedništva Skupštine Saveza
3. Zakon o zaposlenicima u organima jedinica lokalne samouprave  
Izjesticilac: Predrag Šupljeglav, član Radne grupe za izradu teksta zakona
4. Inicijativa Općine Kakanj za za izmjene i dopune Zakona o zaštiti i dobrobiti životinja  
Izjesticilac: Mensur Jašarspahić – Suri, načelnik Općine Kakanj
5. Tekuća pitanja
  - a) Informacija o imenovanju predstavnika Saveza u Radnu grupu za analizu i pripremu rješenja u oblasti pripadnosti javnih prihoda u Federaciji BiH
  - b) Zabilješka sa javne rasprave o Nacrtu zakona o koncesijama i imenovanje predstavnika Saveza u Interresornu radnu grupu za izradu Zakona o koncesijama
  - c) Prijedlog poslovne saradnje radi izbora ličnosti godine najzaslužnije za razvoj općina i gradova  
Izjesticilac: predstavnik Razvojne agencije „EDA“
  - d) Informacija o stanju naplate članarina i o zakupu poslovnih prostorija Saveza
  - e) **Prijedlog sporazuma sa Vladom Federacije Bosne i Hercegovine**
  - f) **Izmjene zakona o plaćama i naknadama u Federaciji BiH (dopis Federalnog ministarstva pravde)**
  - g) **Obavijest o organizaciji sastanka Koordinacionog tijela dva saveza**
  - h) **Protokol Skupštine Saveza**
  - i) **Prijedlog GAP-a o saradnji općina dva entiteta**

G-din Alilović otvara diskusiju.

Nakon konstatacije da nema prijavljenih za diskusiju, stavlja dopunjeni Dnevni red na glasanje.

**Jednoglasno je usvojen dopunjeni Dnevni red.**

G-din Alilović prelazi na prvu tačku Dnevnog reda.

## **1. Usvajanje Zapisnika i zaključaka sa Petnaeste sjednice Predsjedništva Skupštine Saveza općina i gradova Federacije Bosne i Hercegovine**

G-din Alilović otvara raspravu. Nakon konstatovanja da nema komentara, stavlja Zapisnik i zaključke na glasanje.

**Zapisnik i zaključci sa Petnaeste sjednice Predsjedništva Skupštine Saveza su jednoglasno usvojeni.**

## **2. Priprema materijala za sjednicu Skupštine Saveza:**

### **a) Izvještaj o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine**

G-din Alilović konstatuje da je Izvještaj o radu Predsjedništva Skupštine Saveza dostavljen u materijalima. Ukratko izvještava o formi i sadržaju Izvještaja, te otvara raspravu.

G-din Omerović pozdravlja prisutne. Smatra da se ne može pohvaliti rad Predsjedništva i Stručne službe po pitanju zakona koji se tiču jedinica lokalne samouprave. Konstatuje da se na svakoj sjednici Predsjedništva govorilo o aktuelnim zakonima, a o nekim čak i od Skupštine u Gradačcu, da se vršio pritisak, ali da nije bilo rezultata. Navodi primjer Zakona o zaposlenicima u organima jedinica lokalne samouprave, da se na njemu aktivno radilo, razgovaralo sa Vladom i Federalnim ministarstvom pravde, pa da se čak i Ustavni sud Federacije BiH očitovao oko važećeg Zakona i da se problem nije riješio. Rezimira da će uskoro lokalni izbori, a ovaj problem još uvijek postoji. Navodi primjer Zakona o šumama i aktivnom učešću u Komisiji i Radnoj grupi. Konstatuje da su se svi borili, ali da rezultata nije bilo. Misli da postoji oko 37 takvih zakona, koji nisu u skladu sa Zakonom o principima lokalne samouprave u FBiH, te konstatuje da više ne želi učestvovati u radu komisija, iako su dobro radile, iz razloga što nema rezultata. Smatra da Savez ne može uticati na više nivoe vlasti, a posebno kantone. Konstatuje da više ne želi da šalje ljude na komisije ako nema rezultata, te da postoje mnoge suprotnosti oko tumačenja, pa i implementacije zakona u različitim kantonima.

G-din Alilović zahvaljuje g-dinu Omeroviću na aktivnom učešću Općine Kalesija u predhodnom periodu, mada se ne bi složio da Savez ništa ne znači.

G-din Šućur smatra da postoje pomoci i da nije tačno da se ništa nije uradilo. Konstatuje da je tekst Zakona o zaposlenicima u organima jedinica lokalne samouprave napisan. Obavještava prisutne da EU ima veliki interes u ovoj materiji, te da su predstavnici EU insistirali da njihovi eksperti pregledaju tekst Zakona. Delegacija EU (eksperti SIGMA-e) dolazi krajem mjeseca oktobra i nakon što pregledaju zakone iz ove oblasti, moći će ići u parlamentarnu proceduru. Smatra da je Savez dosta uradio, i da nije, sada ne bi bilo tog teksta. Isto tako, Savez se uključio u Zakon o šumama i Zakon o koncesijama, a da nije, ne zna se kakav bi tekst išao u proceduru. Istina je da se malo kasni sa Zakonom o šumama, ali ga je ipak napisao Savez, te je moguće da će se ovim Zakonom općine dovesti u ravnopravan položaj i to je veliki uspjeh. Zakon o premjeru i katastru je također napisala komisija Saveza, te ga je ministarstvo u potpunosti prihvatilo, a potvrdili su ga i predstavnici EU kao pravilan koncept. To su odlični rezultati i ne treba biti obeshrabljen. G-din Šućur također naglašava da sutrašnje potpisivanje Sporazuma o saradnji sa Vladom Federacije Bosne i Hercegovine predstavlja veliki uspjeh. Ovo je prilika da Savez zaista postane ozbiljan partner.

G-din Omerović konstatuje da je već puno uloženo i da jedinicama lokalne samouprave trebaju zakoni, a da isti čekaju u Parlamentu. Konstatuje da se svi u Savezu trude.

G-din Alilović također smatra da sve baš ne ide, ali da i dalje treba da se radi na izmjenama i lobiranju. Smatra da treba biti optimista i dalje ulagati napore da se zakoni od interesa za jedinice lokalne samouprave izmjene u korist lokalne samouprave, te stavlja Izvještaj o radu Predsjedništva Skupštine Saveza na glasanje.

**Izvještaj o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine je jednoglasno usvojen.**

**b) Izvještaj o radu komisija Skupštine Saveza općina i gradova Federacije Bosne i Hercegovine za period april 2010. – septembar 2011. godine**

G-din Alilović ukratko izvještava prisutne o radu i aktivnostima komisija Saveza, te otvara raspravu. Nakon konstatovanja da nema komentara, stavlja Izvještaj o radu komisija Skupštine Saveza na glasanje.

**Izvještaj o radu komisija Skupštine Saveza općina i gradova Federacije Bosne i Hercegovine za period april 2010. – septembar 2011. godine je jednoglasno usvojen.**

**c) Strategija razvoja Saveza općina i gradova Federacije Bosne i Hercegovine za period 2011. – 2015. godina**

G-đa Travljanin pozdravlja prisutne. Predlaže da se izmijeni Dnevni red Skupštine Saveza, te da se nakon pozdravnih govora potpiše Sporazum sa Vladom Federacije BiH. Konstatuje da se svi izvještaji šalju svim članicama na komentare i sugestije, ali da je Predsjedništvo najviši organ upravljanja te da je neophodno zauzeti jedinstven stav. Konstatuje da je i Strateški plan dostavljen svim članicama na komentare, te da je dokument produkt rada učesnika četiri radionice. Koristi priliku da se zahvali Švedskoj razvojnoj agenciji SIDA, koja podržava rad Saveza, te je prepoznala Savez kao partnera. Ukratko izvještava prisutne o sadržaju Strategije razvoja Saveza.

G-din Alilović stavlja Strategiju razvoja Saveza na glasanje.

**Strategija razvoja Saveza općina i gradova Federacije Bosne i Hercegovine za period 2011. – 2015. godine je jednoglasno usvojen.**

**d) Strategija lobiranja Saveza općina i gradova Federacije Bosne i Hercegovine**

G-din Alilović konstatuje da je u popodnevnim satima Skupštine predviđena diskusija o lobiranju, te da se tokom te sesije može više komentarisati i na samu Strategiju lobiranja. Daje riječ g-đi Travljanin.

G-đa Travljanin konstatuje da se ovaj dokument može koristiti kao alat u proceduri uticanja na vlast. Smatra da se treba primjenjivati, a da se uklapa i u mogući Kodeks sa Vladom FBiH gdje bi se ministarstva obavezala da pribavljaju mišljenja Saveza i jedinica lokalne samouprave.

G-din Alilović predlaže da se ovaj dokument usvoji i proslijedi na Skupštinu.

G-din Omerović konstatuje da je ovo upravo ono što Savezu nedostaje i da Savez nije uspio u lobiranju. Hvali rad komisija Saveza i konstatuje da su komisije radile bolje nego Predsjedništvo. Misli da je ovo značajan dokument za Savez i da Predsjedništvo da sebi u zadatak da ga primjenjuje.

G-din Alilović se slaže da je Strategija lobiranja dobro napisana i osmišljena, te da je neophodno da u svakom trenutku postoje kompetentni ljudi za lobiranje interesa Saveza. Predlaže da Predsjedništvo bude jedinstveno, te da se samo strpljenjem i upornim radom mogu mijenjati stvari, počevši od Predsjedništva. G-din Alilović stavlja Strategiju lobiranja Saveza na glasanje.

**Strategija lobiranja Saveza općina i gradova Federacije Bosne i Hercegovine je jednoglasno usvojena.**

**e) Plan rada Saveza općina i gradova Federacije Bosne i Hercegovine za period 2011. – 2012. godina**

G-đa Travljanin ukratko izvještava prisutne o Planu rada Saveza za naredni period. Konstatuje da se veća pažnja posvećuje zakonima koji tretiraju finansiranje jedinica lokalne samouprave.

G-din Alilović otvara diskusiju i moli za sugestije ukoliko je potrebno dodati neke zakone.

G-din Omerović smatra da je potrebno u Plan rada ubaciti i IPA fondove i ostale fondove Europske unije koji su sada aktuelni, a vrlo bitni za jedinice lokalne samouprave. Smatra da Savez treba organizovati sastanke sa zemljama uključenim u prekograničnu saradnju kako bi općine imale mogućnost naći partnere.

G-đa Travljanin objašnjava da se Plan rada Saveza odnosi na zakonodavne djelatnosti, a da je Savez uključen u prekograničnu saradnju i kao partner DEI-u i drugim relevantnim institucijama u ovom domenu.

G-din Alilović stavlja Plan rada Saveza na glasanje.

**Plan rada Saveza općina i gradova Federacije Bosne i Hercegovine za period 2011. – 2012. godine je jednoglasno usvojen.**

#### **f) Odluka o izmjeni Odluke o obrazovanju Komisije za razvoj i unapređenje lokalne samouprave**

G-đa Turkić izvještava prisutne da je došlo do izmjene u sastavu Komisije za razvoj i unapređenje lokalne samouprave. Naime, dosadašnji član Komisije više nije uposlenik općine, te je neophodno izvršiti izmjenu.

G-din Šućur konstatuje da je potrebno izvršiti izmjenu u Statutu Saveza, tj. da se imenuje općina kao član, a ne osoba, što bi smanjilo komplikacije ove vrste.

G-din Kamočaji pozdravlja prisutne u ime Gradonačelnika Sarajeva. Konstatuje da mu je čast da ima priliku da prisustvuje sjednici Predsjedništva. Ima primjedbu na tekstualni dio odluke gdje u naslovu Odluke nedostaje riječ „samouprave“ .

G-din Alilović podržava g-dina Šućura.

G-din Šućur podsjeća prisutne oko komplikacija i mandata tokom Izborne skupštine Saveza, te ukazuje na to da bi se to moglo u budućnosti izbjeći predloženom izmjenom.

G-din Šupljeglav predlaže da Predsjedništvo donese zaključak da Komisija za ustavna i zakonodavna pitanja uradi pripremu izmjena Statuta Saveza, te da se u narednom periodu ponudi nacrt izmjena Predsjedništva.

G-din Alilović stavlja Odluku o izmjeni Odluke o obrazovanju Komisije za razvoj i unapređenje lokalne samouprave i prijedlog g-dina Šupljeglava na glasanje.

**Odluka o izmjeni Odluke o obrazovanju Komisije za razvoj i unapređenje lokalne samouprave i prijedlog da Komisija za ustavna i zakonodavna pitanja pripremi nacrt potrebnih izmjena Statuta Saveza su jednoglasno usvojene.**

### **3. Zakon o zaposlenicima u organima jedinica lokalne samouprave**

G-din Šupljeglav ukratko izvještava prisutne o aktivnostima Radne grupe za izradu Nacrta zakona o zaposlenicima. Također izvještava da su bile i dvije konferencije organizovane u saradnji sa OSCE-om i Federalnim ministarstvom pravde. Po programu Vlade Federacije BiH ovaj zakon bi vrlo brzo trebao biti na dnevnom redu. Konstatuje da su u Nacrtu zakona uključena sva rješenja bitna za jedinice lokalne samouprave kako bi osigurali neometan rad, posebno prilikom prijema, premještanja, unapređenja i nagrađivanja zaposlenika, a koja su usklađena sa Zakonom o državnoj službi. G-din Šupljeglav smatra da je Zakon ponudio dobra rješenja i u skladu je sa drugim zakonima.

G-din Alilović otvara raspravu.

G-din Šućur predlaže da predstavnici Saveza traže da budu uključeni u radnu grupu koja će sa predstavnicima EU (SIGMA) razmatrati ovaj zakon.

G-din Omerović konstatuje da član 66. nije dobro formulisan i da je napravljen previd.

G-din Šupljeglav konstatuje da je tematika razrađena u drugim članovima.



G-din Alilović stavlja Nacrt zakona o zaposlenicima u organima jedinica lokalne samouprave i prijedlog da se uputi dopis resornom ministarstvu kako bi predstavnici Saveza učestvovali na sastanku sa predstavnicima EU (eksperti SIGMA-e) na glasanje.

**Zakon o zaposlenicima u organima jedinica lokalne samouprave i prijedlog da se uputi dopis resornom ministarstvu za učešće predstavnika Saveza na sastanku sa predstavnicima EU (eksperti SIGMA-e) su jednoglasno usvojeni.**

#### **4. Inicijativa Općine Kakanj za za izmjene i dopune Zakona o zaštiti i dobrobiti životinja**

G-din Alilović konstatuje da g-din Jašarspahić nije mogao stići na sjednicu, a da u materijalima nema teksta Inicijative, te da će se ova tačka razmatrati sutra. Konstatuje da je g-din Jašarspahić prošle godine napustio sjednicu Skupštine jer se uzrujao, te da je bitno da se o ovoj Inicijativi raspravlja.

G-đa Travljanin konstatuje da je g-din Jašarspahić kontaktirao Stručnu službu Saveza i da će biti prisutan sutra.

G-đa Turkić konstatuje da Inicijativa nudi konkretne izmjene i dopune Zakona. U želji da riješimo ovaj problem uvrstili smo Inicijativu na Dnevni red iako se radi o državnom zakonu, te je potrebno da se razmatra na sastanku Koordinacionog tijela dva saveza. Međutim, zakazani sastanak Koordinacionog tijela je odgođen.

G-din Alilović konstatuje da on nema tekst Inicijative, te da je potrebno sačekati sastanak Koordinacionog tijela. Savez je zauzeo stav da se ovaj Zakon povuče iz primjene ili da se za implementaciju osiguraju sredstva jer je rađen bez konsultacija sa jedinicama lokalne samouprave. Predlaže da ovaj Zakon tretira relevantna komisija Saveza i da bude tema sastanka Koordinacionog tijela.

**Prijedlog je jednoglasno usvojen.**

#### **5. Tekuća pitanja**

##### **a) Informacija o imenovanju predstavnika Saveza u Radnu grupu za analizu i pripremu rješenja u oblasti pripadnosti javnih prihoda u Federaciji BiH**

G-đa Kovačević konstatuje da je Federalno ministarstvo finansija uputilo dopis Savezu i dalo rok od samo jednog dana da se imenuju dva predstavnika Saveza u Radnu grupu. Iz tog razloga, Stručna služba je morala ekspeditivno djelovati i imenovani su g-din Emir Dedović, pomoćnik načelnika za financije u Općini Novi Grad Sarajevo i gđa Vesna Travljanin, direktor Saveza. Potrebno je odrediti predstavnike, te poslati novu Odluku Federalnom ministarstvu finansija.

G-din Alilović postavlja pitanje nominacije članova za ovu Radnu grupu. Smatra da bi to mogao biti g-din Hakija Osmić.

G-đa Kovačević konstatuje da je g-din Hakija Osmić već u jednoj od radnih grupa.

G-din Kamočaji predlaže da se informacija primi k znanju.

G-din Smajlović smatra da bi trebalo imenovati osobu stručnu za ovaj domen.

G-đa Kovačević konstatuje da je izmjena moguća, te da neće biti problema naknadno informisati Federalno ministarstvo finansija.

G-din Šućur informiše Predsjedništvo da je ova Radna grupa zadužena za analizu stanja, a da je slijedeća faza izmjena zakonske regulative.

G-din Alilović predlaže da se imenuje g-din Hakija Osmić umjesto g-đe Vesne Travljanin, a da g-din Emir Dedović i dalje ostane kao drugi predstavnik Saveza.

**Prijedlog je jednoglasno usvojen.**

**b) Zabilješka sa javne rasprave o Nacrtu zakona o koncesijama i imenovanje predstavnika Saveza u Interresornu radnu grupu za izradu Zakona o koncesijama**

G-đa Turkić ukratko izvještava Predsjedništvo o održanoj javnoj raspravi o Nacrtu zakona o koncesijama. Konstatuje da Nacrt zakona nije adekvatan i pošto će Vlada Federacije BiH formirati radnu grupu za izradu konačnog teksta, na ovoj raspravi je predloženo da se kao predstavnik Saveza imenuje g-din Hamdo Ejubović, koji je i član Komisije za ekonomski razvoj. Također, g-đa Turkić izvještava da općine nisu dostavile primjedbe na tekst Zakona, a to bi trebale učiniti što prije kako bi Interresorna radna grupa imala materijal.

**Prijedlog imenovanja člana Interresorne radne grupe za izradu Zakona o koncesijama je jednoglasno usvojen.**

**c) Prijedlog poslovne saradnje radi izbora ličnosti godine najzaslužnije za razvoj općina i gradova**

G-đa Travljanin izvještava da predstavnik EDA-e nije u mogućnosti prisustvovati današnjoj sjednici. Konstatuje da je ovo možda i tema za Koordinaciono tijelo dva saveza jer bi se izbor ličnosti godine odvijao na teritoriji Bosne i Hercegovine.

G-din Smajlović konstatuje da su ga predstavnici EDA-e zamolili da on predstavi prijedlog. Smatra da je ovo dobra šansa da se stvori takmičarski ambijent. Nije protiv da ovo ide i na Koordinaciono tijelo, ali smatra da Predsjedništvo u svakom slučaju treba da zauzme stav, te predlaže da se ovaj prijedlog prihvati.

**Prijedlog je jednoglasno usvojen.**

**d) Informacija o stanju naplate članarina i o zakupu poslovnih prostorija Saveza**

G-din Alilović izvještava Predsjedništvo o naplati članarina, te konstatuje da je iznenađen činjenicama. Smatra da je priliv članarina nedovoljan, te da manjak sredstava može dovesti u pitanje izvršavanje godišnjeg plana. Smatra da se Predsjedništvo treba aktivnije uključiti u naplatu članarina. Konstatuje da su svi dobili pregled naplate članarina i predlaže da se članovi Predsjedništva malo aktivnije uključe.

G-din Ramović konstatuje da se ne zaborave obaveze članica.

**Informacija je primljena k znanju.**

**e) Prijedlog Sporazuma sa Vladom Federacije Bosne i Hercegovine**

G-din Alilović izvještava da je g-din Šućur već izvijestio članove Predsjedništva da je Vlada Federacije Bosne i Hercegovine na svojoj sjednici održanoj jučer podržala tekst Sporazuma o saradnji Vlade Federacije BiH i Saveza općina i gradova Federacije BiH. Nije siguran da li je potrebno ulaziti u sadržaj Sporazuma koji je općeg karaktera, a koji ima za cilj poboljšanje odnosa Saveza sa Vladom Federacije BiH.

G-din Omerović postavlja pitanje u vezi sa kantonima.

G-din Šućur podsjeća prisutne da je prije dvije godine pokrenuta inicijativa oko izrade Kodeksa. Već tada su radna tijela napravila nacrt Kodeksa koji sada može poslužiti kao platforma za izradu Kodeksa sa Vladom Federacije BiH. Naravno da se u ovo trebaju uključiti i kantoni.

G-đa Travljanin predlaže da se oko samog protokola potpisivanja naknadno dogovori.

**Informacija je primljena k znanju.**

**f) Izmjene zakona o plaćama i naknadama u Federaciji BiH (dopis Federalnog ministarstva pravde)**

G-din Alilović čita dopis iz Federalnog ministarstva pravde kojim se traži mišljenje Saveza na spomenuti Zakon.

G-đa Kovačević konstatuje da je ovaj Zakon razmatran na sjednici Predstavničkog doma Parlamenta FBiH i to u formi nacрта. Stručna služba Saveza je uputila Nacrt zakona svim članicama na dostavljanje mišljenja, nakon čega smo dobili dopis iz federalnog parlamenta da su komentari općina prosljeđeni u daljnju proceduru. Federalno ministarstvo pravde je dostavilo dopis sa Nacrtom zakona, koji je Stručna služba opet poslala članicama na mišljenje.

G-din Ramović smatra da je potrebno tokom Skupštine zahvaliti onima koji pomažu radu Saveza.

G-din Šućur pita da li su komentari uključeni u novi Nacrt? Ako jesu, onda sugerije da se sazove komisija. Izvještava članove da je na jutrošnjem sastanku sa Federalnim ministarstvom pravde vođena rasprava oko ove teme, tj. da Federacija nema pravo određivati kako će i koliko će se u odnosu na kantone isplaćivati plate i naknade u jedinicama lokalne samouprave. Međutim, ukoliko Federacija daje grantove općinama, onda će moći zahtjevati poštivanje svojih smjernica u ovom pogledu.

G-đa Turkić konstatuje da je komisija već raspravljala na ovu temu i na Inicijativu Općine Tuzla i da je takav prijedlog već otišao prema Federalnom ministarstvu pravde.

G-đa Travljanin smatra da su potrebni malo duži rokovi da bi Stručna služba provjerila da li su komentari jedinica lokalne samouprave uključeni u Nacrt.

**Informacija je primljena k znanju.**

#### **g) Obavijest o organizaciji sastanka Koordinacionog tijela dva saveza**

G-din Alilović izvještava prisutne da su savezi planirali sastanak Koordinacionog tijela u Neumu. Međutim, zbog ranije preuzetih obaveza, članovi iz RS-a nisu mogli prisustvovati, te su zamolili da se odredi novo vrijeme sastanka.

**Informacija primljena k znanju.**

#### **h) Protokol Skupštine Saveza**

G-din Alilović otvara raspravu.

G-din Jerkić konstatuje da ima nekih stvari koje je Savez mogao bolje uraditi, ali i da je veliki dio odgovornosti na višim nivoima vlasti koji prebacuju odgovornost jedni na druge. Bitno je da su problemi zajednički i da ih sve općine imaju, kao npr. javni prihodi.

G-din Alilović konstatuje da je jedan od zakona i Zakon o pripadnosti javnih prihoda.

G-din Hajder pozdravlja prisutne i izvinjava se za kašnjenje jer je bio na sastanku sa Premijerom Vlade Federacije BiH. Ima sugestiju da se pojača interna propaganda i komunikacija među načelnicima. Smatra da nema redovne komunikacije sa svim članicama Skupštine. Misli da više treba promovisati rad Predsjedništva i iskoristiti ovakve događaje i u tu svrhu. To može i motivacijski djelovati na druge članice.

G-din Alilović se slaže sa g-dinom Hajderom i predlaže da Stručna služba poduzme neophodne korake.

**Informacija primljena k znanju.**

#### **i) Prijedlog GAP-a o saradnji općina dva entiteta**

G-din Beglerbegović pozdravlja prisutne. Konstatuje da u svom radu dolazi u kontakt sa mnogim načelnicima iz cijele Bosne i Hercegovine. Na osnovu razgovora spoznao je da bi načelnici podržali ideju organizovanja sastanaka sa načelnicima iz cijele Bosne i Hercegovine. GAP će poslati pismo



svim općinama u Bosni i Hercegovini kako bi se identifikovale zainteresovane općine ukoliko imaju i podršku Saveza.

G-din Smajlović konstatuje da je to vrlo pozitivna aktivnost i da je podržava.

G-din Maslo pozdravlja prisutne. Konstatuje da je GAP istinski partner Savezu. Cilj GAP-a je da prije isteka projekta što bolje tehnički pomogne Savez, kako bi mogao preuzeti i nastaviti implementaciju GAP projekta. Savez ima i imati će i dalje podršku međunarodne zajednice i donatorskih institucija. Smatra da je Sporazum sa Vladom Federacije Bosne i Hercegovine velika stvar. To je znak da prepoznaju Savez i važnost Saveza. GAP će i dalje podržavati Savez, ali je činjenica da Savez treba biti još prodorniji.

**Prijedlog GAP aktivnosti je jednoglasno podržan.**

Nakon što je konstatovano da su sve tačke Dnevnog reda iscrpljene, g-din Alilović zatvara Šesnaestu sjednicu Predsjedništva Saveza u 19:00 sati.

Predsjednik Predsjedništva Skupštine  
Vlado Alilović, s.r.